

Vijeće ministara BiH je na sjednici održanoj 3. marta prihvatilo Inicijativu Ministarstva finansija i trezora BiH i odredilo delegaciju za vođenje pregovora radi zaključivanja Sporazuma o zajmu i projektu između KfW (KfW Development Bank) razvojne banke iz Frankfurta na Majni i BiH vrijednosti 60 miliona eura za Vjetropark Hrgud u općini Berkovići.

Vjetropark Hrgud će biti instalisane snage 48 MW (16 jedinica po 3 MW) i procijenjene godišnje proizvodnje od 126 GWh i zahvatat će površinu od cca pet kilometara kvadratnih. Za izgradnju je Njemački razvojni fond rezervisao 60 miliona eura kreditnih sredstava. Ukupna investiciona vrijednost iznosi 64,5 miliona eura, od čega su 4,5 miliona eura vlastita sredstva, a preostali dio se obezbjeđuje putem kredita.

Iz Elektroprivrede Republike Srpske su nam kazali da je u dosadašnjim pripremnim aktivnostima, KfW finansirao Projekat mjerenja karakteristika vjetra u RS-u, za što je obezbjeđeno 600.000 eura grant sredstava.

Najperspektivnijih lokacija

Mjerenja su rađena na pet lokacija i za svaku od njih je urađena prethodna studija izvodljivost. Na osnovu rezultata mjerenja i preporuka koje su dale studije, Elektroprivreda RS-a (MH ERS) se opredijelila za Hrgud kao jednu od najperspektivnijih lokacija, gdje je procijenjena neto godišnja proizvodnja od 126 GWh.

“U skladu sa opredjeljenjem, MH Elektroprivreda RS-a je putem Ministarstva industrije, energetike i rudarstva podnijela zahtjev za dodjelu koncesije za izgradnju Vjetroparka Hrgud, tako da je nakon Odluke Vlade Republike Srpske da se istom udovolji, zaključen Ugovor o koncesiji 28. septembra 2015. godine. Ukupno vrijeme potrebno za pripreme aktivnosti i izgradnju vjetroparka je tri godine, od čega za pripreme aktivnosti dvije godine i za konkretnu izgradnju godina”, rekao nam je glasnogovornik MH ERS Predrag Škoro. Pripreme aktivnosti na projektu podrazumijavaju izradu Studije procjene utjecaja na životnu sredinu koja zahtijeva prethodno provođenje ornitoloških istraživanja (jednogodišnje posmatranje migracije ptica, slijepih miševa i drugih vrsta na lokaciji projekta). Za ove aktivnosti KfW će obezbjeđiti grant od 200.000 eura. Kako nam je kazao Škoro, u toku su aktivnosti sa KfW-om oko pripreme projektnog zadatka za izvođača Studije procjene uticaja na životnu sredinu.

“U cilju preciznijeg rasporeda vjetrogeneratora i izbora tipa generatora, prethodna studija izvodljivosti je preporučila provođenje dodatne jednogodišnje kampanje mjerenja brzina vjetra na lokaciji Hrgud. U skladu sa pravilima KfW-a, ove aktivnosti zahtijevaju angažovanje konsultanta, koji će pored dodatnih mjerenja imati zadatak da izradi detaljan idejni projekat Vjetroparka koji uključuje pristupne puteve i priključak na prijenosnu mrežu. Nakon

usvajanja idejnog projekta krenut će se u pripremu tenderske dokumentacije i odabir izvođača”, pojasnio je Škoro.

Napomenuo je da su pripremne aktivnosti jako zahtjevne i da su smještene u jako uzak vremenski okvir. Zbog toga je sa KfW-om dogovoreno da se odmah nakon pregovora, prije nego što se potpiše kreditni sporazum, krene u izbor konsultanta, tako da je ugovor za njegovo angažovanje spreman za potpis odmah nakon potpisa Sporazuma o kreditu.

U skladu sa nadležnostima u BiH i praksom koja prati zaključivanje kreditnih aranžmana, potrebno je najmanje šest mjeseci od pregovora do zaključenja Sporazuma o kreditu.

“Upravo sa ovim paralelnim aktivnostima, dok se ne završi potpisivanje Sporazuma o kreditu, nastojimo postići planirani rok od 2 godine za pripremu projekta”, kazao je glasnogovornik MH ERS Predrag Škoro.

Strateški projekat za općinu Berkovići

Načelnik općine Berkovići Nenad Abramović nam je kazao da je riječ o strateškom projektu za općinu Berkovići, koja svoj razvoj zasniva, između ostalog na energetici.

“Izgradnja Vjetroparka Hrgud je od izuzetnog značaja za općinu Berkovići, koja ga je snažno podržavala od samog početka. Tako je 2009. godine Vjetropark uvršten u Prostorni plan općine Berkovići za period 2009-2030 godina, a mnogo godina ranije vršena su potrebna istraživanja”, kazao je Abramović u razgovoru za Klix.ba.

Završetkom izgradnje Vjetroparka Hrgud u budžet općine Berkovići slivat će se koncesivna naknada od nekoliko stotina hiljada KM. Riječ je o namjenskim sredstvima koja se isključivo mogu koristiti za razvojne projekte.

“Budući da općinu Berkovići kao izrazito nerazvijenu općinu karakteriše velika nezaposlenost, projekat doprinosi i povećanju zaposlenosti. Također kroz projekat očekujemo i rješenje problema putne komunikacije i vodosnabdjevanja sela Hrgud”, rekao je Abramović.

Podsjetio je da je koncesiju za izgradnju Vjetroparka Ministarstvo industrije, energetike i rudarstva Republike Srpske, putem pregovaračkog postupka dodijelilo kompaniji MH Elektroprivreda RS MP a.d. Trebinje. Koncesioni period je 50 godina. Ukupna vrijednost investicije je 125.730.532,00 KM.

izvor: